

殿邑人任道遜篆蓋

處士諱輿字民載別號確菴其先諱

五季之亂從閩徙平陽之鏡川族屬繁衍

名所居為吳家埭四傳至諱尹遭宗靖康

之變能設奇禦寇補公安縣尉又三傳諱

彛授魁淳祐癸卯鄉榜未仕而卒再傳至

諱德潤元平陽儒學教諭教諭之弟諱德

源子朴始居瑞安邑城狀元坊是為

曾祖祖諱敏父諱應復善行義鄉

善本諱不出借



稱長者處士幼警敏負志氣讀書鄉校卓
然異羣輩母林蚤卒時甫十歲哀哭如成
人事父及繼母虞克謹子職時政苛歲歉
私公務煩處士悉力為之不以貽親憂代
理家政勤於樹立闢產拓業日致饒裕而
父得優游自適五十年及遘疾再越月湯
藥之奉必身親之既卒殮葬真祭一循古
禮先是為父預營壽藏將葬堪輿家沮以
歲月未利處士曰與其利身而緩期孰若

上二
循禮而悖俗遂葬之其創祠堂置祭田續
世譜凡尊祖敬宗之事必力為之季父諱
應觀

國朝洪武間以茂才薦任撫州府照磨陞黃
陂知縣沒于官為其後者處士母弟輪道
遠不能歸葬處士遣二力走數千里扶柩
挾輪偕還為營壙以窆承奉叔母撫弟姪
藹然孝友之行愛其子必擇師訓迪每讀
書史善者俾子姪效之不善者令戒之性

和易與物無竟智識過人度事之可否後
皆如其言鄉隣有不平或就處士決之一
語輒止美鬚容灑然如神仙中人與交皆
一時文行士待之必以恭誠平生務積德
解人危急莫或自矜歲飢出穀以石計
者凡三百有五十

朝廷詔有司立碑題其名梅林永安市經行
者衆道路棘艱乃購甃石以甃塔山斗門
高峻捐貲命工䟽鑿他如恤宗婣之窘賑

鄉里之乏所謂為義若嗜慾者處士有焉
平居雖子弟不聞其言笑惟賓客過後雍
容款洽自朝逮夕無惰容配安人王氏邑
處士惟善之女儉勤端懿克相其成生子
男二長祿次裡女四適宋勉唐佇周敬包
壘皆士族側室金氏生子男二曰初曰祚
祚為邑庠生領景泰丙子鄉薦鄭氏生子
男二曰祐曰裡孫男十有五昱晟珮暉曙
星珏寶琮琤琯珽慶璠女四適章寶餘

幼曾孫男紹鉅純處士生于洪武甲子九月二十五日卒於正統丁卯十一月二十七日享年六十有四安人生于洪武癸亥七月十五日卒於景泰癸酉十月九日享年七十有一其孤祿奉狀泣拜曰祿不孝喪先君已踰祥制今母又不幸棄去襄事苟復臯緩罪莫大焉今將以母卒之年十二月二十四日合葬來慕鄉梅林先隴之次墓上之石幸哀而與銘庶昭行實以贖

諸幽於乎處士德周于身惠及于人雖不
沾一命以卒澤之鍾于後人者固有在矣
予既與有姻感義不容辭乃序而銘之銘
曰

吳為著姓

儒宦起家

派別支分

其衍則遐

猗與處士

式繩以續

孝友謙恭

厥身是泚

顯然有孚

惕若無咎

之紀之維

規圖永久

叙迹及疏

仁惇義敷

聞馳望崇

既碩且都 厥配之良 克相以德

抑抑其儀 教行閩閩 合窳祖原

委祉儲祥 慶延後人 千秋賁歲

明故確菴吳處士墓表

賜進士及第朝列大夫南京國子祭酒前翰

林學士同修 國史兼

經筵講官晉陵王與撰

正議大夫南京禮部左侍郎郡人章綸書

中憲大夫致夔州府知府事前太常寺少

卿

經筵官晉陵王謙篆

吾常郡通守瑞安吳君以公事來南京事
竣且歸手一編過予請曰此先考妣之幽
潛所寓蓋述行之狀銘葬之辭哀輓之章
其闡揚畧具歎墓石未刻垂二十年以有
待也今祚承遺教幸有位于時又幸從賢
士大夫遊失此不圖將遂成大戾惟先生
不鄙而賜之文抑又幸焉處士諱輿字民
載別號確菴少質厚穎敏十歲喪母林哀

慕不輟事繼母虞克孝父應復甫憐之教
之學期有成立弱冠代父理家吳既大族
公私百務歲間不登酬應躋劇處士治之
有緒家用不墜而應復甫得遂暇豫者閱
五十年比卒治喪有禮應復甫嘗預營壽
藏于祖壟之側至是將葬術者謂歲月未
利曷少緩處士曰古者葬無常地無常日
茲地既吾親所卜將歸安於此吾親安吾
暇計其他營福利耶遂窆焉季父應觀洪

武中舉茂才應撫州照磨知陂黃縣卒官
無子處士之弟輪為之後力不能還葬訃
至走二僕千里歸其櫬葬已奉叔母蔣如
其母撫輪篤恩愛如初正統間浙東荐饑
發粟七百斛助官賑贍

朝廷聞之命有司立碑以旌厥義邑梅林永
安市下濕暑雨泥淖行道病之處士捐資
甃以甃石募工疏鑿塔山水門以便灌溉
農田稱利至於竭其所有以濟人之乏隨

其力之所及以解人紛爭拯人顛危其所
為大率多義重事而於待宗媿特厚修譜
系置祭田立祠堂尊祖敬宗收族士行於
斯為脩處士美髯豐儀平居不妄語笑賓
客過從款洽終日未始以怠惰廢禮故所
交多一時名士擇其尤賢聘為子師勸善
懲惡其所以戒飭諸子姓者尤諄諄也處
士年六十四以正統丁卯十二月二十七
日卒娶王氏邑著姓惟善之女端靜貞淑

內相稱賢景泰癸酉十月九日卒壽七十
一其年十二月二十四日合葬邑來暮鄉
梅林先塋側室金氏鄭氏子男六人祿裡
初祚祐裡祚由丙子鄉薦授承德郎常州
府通判女四人宋勉唐佇周敬包壘其壻
也孫男十九人昱晟玆畢曙星珏寶琮珽
珣珵珩慶璠碧瑩彩瓘女四人長適章寶
餘在室曾孫男三人紹鉅純其先在五季
時有諱遠者自閩徙溫之平陽鏡川其族

日盛稱吳家埭遠四世為宋公安尉尹尹
三世為淳祐癸卯鄉魁舜授舜授之孫德
潤元平陽學教諭其季德源公高祖也德
源生朴始徙瑞安朴生敏敏生應復世以
名德相承垂休委祉在其嗣人碩大蕃昌
有隆無替揆厥本源既有攸自而又重以
處士之賢培植而濬導之是故宜其後之
顯揚而榮光益熾也蓋豐祿之養雖未及
享於生存而

日盛稱吳家埭遠四世為宋公安尉尹尹
三世為淳祐癸卯鄉魁舜授舜授之孫德
潤元平陽學教諭其季德源公高祖也德
源生朴始徙瑞安朴生敏敏生應復世以
名德相承垂休委祉在其嗣人碩大蕃昌
有隆無替揆厥本源既有攸自而又重以
處士之賢培植而濬導之是故宜其後之
顯揚而榮光益熾也蓋豐祿之養雖未及
享於生存而

寵命之褒行且有加於歿世觀之處士誠可
為為善者勸矣予故不辭而屢書之以復
通守俾歸而鏡諸石

成化癸巳春吉孤哀子祿等立石

確菴吳處士輓詩序

士君子使人稱譽於生者易使人稱譽於
死者難有祿位而使人稱譽者易無祿位
而使人稱譽者難何哉或和光以為大同
或矯激以為耿介然可以盜虛名於一時

而不可免公論於百世觀樊英种放旋詐
旋露生已受譏而况於既死也哉有祿位
者喜可賞怒可罰故或進諛以媒官或獻
佞以繳利稱鄒忌之美者比比皆是然田
文翟公之客已背之於富貴貧賤之間而
况於死生存亡也哉昔人云丈夫蓋棺其
事始定予亦云士大夫既窆其譽始定觀
處士蓋可見矣處士抱大志然命與時違
落落一布衣無賞罰以及人無貨利以要

人胡名公鉅卿田夫野老其生也曰吳處士善人其死也曰吳處士善人稱之不已至於哀輓之詩連篇累牘嗚呼是豈可以虛偽釣之耶是豈可以僥倖得之耶是豈有喜以賞之有怒以威之耶是豈因其生而曲為取諛耶是豈死則遂忘者耶或曰黃鳥之哀三良薤露之哀田橫彼固死者也彼亦有道士乎哉予曰不然三良阿意以殉作詩者一以刺秦穆之無知一以悲

三良之妾婦田橫負固取戮作詩者一以
笑田橫之不知一以歎人死之不歸夫豈
果足以為人典刑而人心之不舍乎然亦
不過一二篇而已未有如處士之多也夫
然後知處士之善果足以感人而不止乎
一已果足以傳後而不止乎一時處士雖
死猶不死也抑處士之子祚以鄉貢進士
通守常州善政善教

褒封有日又孰謂處士之善終歛而不施乎

處士諱輿字民載溫州瑞安人其行事具
見王祭酒先生墓表茲不贅
成化癸巳夏浙進士張錫書

詩

前人積累慶源長孝義存心重一鄉月犯
少微星已殞風悲落葉樹堪傷靈椿無復
千年壽芳桂長飄萬斛香別駕只今聯五
馬孝思罔極淚沾裳
樂清章綸

榮業繁兒息康時足壽年皇天惟輔德

褒封賁九泉

雲間鄭珪

嗚呼歲在蛇哲人嗟青山月冷啼夜鶴白
楊風酸鳴暮鴉哲人嗟矣今何在惟有香
名滿湖海髻年喪母寢苦塊淚落麻衣和
血灑華堂養父饋珍烹膝下躡躑舞菜綵
中郎卒官家黃州破屋孤燈妻女愁蒼頭
千里迎旅櫬玉骨一函歸故丘頻年兩浙
穀不登私廩散盡周饑氓鷄衣鵠形春色
轉龍翔鳳舞天書旌病民霖淖行荆莽捐

金築道平如掌便民灌溉鑿科門不盡恩
波流浩蕩哲人嗟矣孝義無天教養子為
鳳雛鳳鳴高岡駭鸞鵠地下鷹鷂瘖不呼
褒封會見來

勅紙墓門夜夜祥光起 晉陵薛承學

素聞梧竹標髯髮脩且鬢酷愛林泉清煙
霞矢終隱卜地幽復幽城市遠喧躋結屋
藉山茅圖書充棟榱苦讀不出門食惟蕨
與筍言若不出口笑恒不至矧汪洋黃叔

度迂腐郭山憚黃也仰慕之郭也付朝靴
衣冠厭紈綺裘葛甘敝緼顏容藹春陽胸
次洗憶忿少壯若老成人莫探其蘊十歲
喪其母雙淚三年校繼母上及父事之益
醇謹甘旨隨晨昏子道希曾閔中歲父又
喪號泣身欲殞豈徒宗黨間聞者咸惻憫
繭藏舊已營刻日欲發靴或者謂歲月為
家之咎疾先生秉周禮淺土深不忍舉棺
掩玄扃甘為俗人哂季父薦茂才曾為黃

陂尹不幸卒于官諸子方牙齷裹糧走刀
足扶襯還封吟孝友出天性兢惕行惟敏
鄉有舜跖徒去取雙昭眡家庭示子孫鑑
戒勵齊省饑年官儲空捐粟罄倉困

朝廷為立碑高義永標準崎嶇永安市行旅
抱嗔憤塔山有斗門水洶衆患緊或甃以
甃石或䟽其口吻功勲等丘山視之猶塵
坳春苗事種耰秋稼登載稠呼童洒堂宇
賓客招素躬上論至義皇從容傾家醞平

生剛毅氣浩然塞蓋軫炎炎權倖府此足
肯辱窘處衆廼由由未嘗輕喜愠异哉世
之人侷促一螻蚓二三肆強梁羽翮張鳴
隼顏風不可回舉目多嗤蠢先生間氣豪
美玉自藏韞烏中之鸞鳳草中之芝董六
十有四歲元物散玄牝皇天不憖遺倉扁
徒候診玉樓倏忽成星斗匝欄楯詩蒐招
弗歸楚興空傷恣梅林來暮鄉先壠分杯
墳玉樹埋於斯無忍放牛羶春秋雨露淒

禽鳥啼椒菌掛劔伊誰氏悲哭出肝腎有
子稱白眉蜚聲雷殷殷道理在聖經細大
務撫攢發而為文章精妍浮海蜃詞賦信
口成唐家比元稹出佐古常州民疴掃瘰
疹三年上獻最循良已銓允

九重方側席指日召華近仁人當有後食
報良未盡封贈坐可期錦誥五花纈天使
下焚黃輝光被松槿浙山高峩峩浙水流
泯泯山水有改更先生名不隕吾詩聊寫

衷言語敢脂粉
薤露續者多
臨風試題引

蒲田林孟和

生前令德重如山
歿後名垂宇宙間
白鶴已隨僊夢去
海天空濶幾時還

錫山陳進之

新田常稔險途平
多少農商頌姓名
野廟如何有淫鬼
論功只合祀先生

華亭張弼

樂道山林雪滿簪
養高不作傳巖霖
開倉

散積賙人急立石題名沐

寵深一旦衣冠歸后土千年聲價重儒林東
溟弱水無涯底難比賢侯孝慕心

錫山華祖芳

確庵處士久云沒鄉里人猶說姓名豐頷
美髯真可畫高情懿行未容評教兒自許
求官得散粟曾承立石旌愧我後時徒悵
望坐吟哀挽憶平生

蘭谿郭時頤

脫畧浮名與世忘
結盟泉石足徜徉
崑岡美玉元無價
滄海明珠自有光
仁義存心甘白首
詩書教子佐黃堂
一從處士星沉後
千古悲風慘白楊

山陰王淵

嘉遯林泉歲月長
清風占斷水雲鄉
邵評冷落名猶在
季劔飄零事可傷
老去黃梁千古夢
庭看丹桂一枝香
聖時定有推恩勅
只在慙慙補舜裳

括蒼金文

季子高風世所尊
隱君行誼久彌敦
種來

穀粟周鄉里收得詩書教子孫
薤露百篇歌不已
梅林千古惠常存
黃堂判守馳佳譽
褒典方期荷

帝恩

晉陵王謙

湖海多年播令名
偶看遺傳識平生
亢宗不墜詩書業
友弟能全手足情
墓石有銘煩太史
漆燈無燄闕佳城
鳳雛天上推恩日
忍見焚黃到九京

錫山高直

逢人問耆舊回首幾凋零不識吳公事猶
傳太史銘白頭空宰社清淚憶趨庭落日
梅林路哀猿不可聽 黃巖謝鐸

喬門喜見柏森森教子簪纓賦上林道上
霜風千古節天涯孝義一生心琴書寂寞
山窓冷猿鶴哀鳴壠樹深自是長君多善
處鄉人傳說到于今 吳璘

遁跡煙霞樂隱淪高風不愧古之人畏途
平險知由義私廩賙貧只體仁玉樹埋雲

萬里夜斗門通水稻畦春昭昭潛德銘貞
石翹首梅林倍愴神 吉水龍晉
有禮繩家義處鄉姓名沒後到今香里人
懷惠知多少一過高墳一斷腸

太平謝省

賢郎為郡毘陵日令我題詩想確菴矯矯
人龍不可覩紛紛俗駕豈能參陰功已見
資來世孝友還留作美談只有梅林埋玉
處年年清氣照江南 錫山秦旭

確菴遺事許誰知兒輩哀思已過時林下
一區高士宅里中三尺義民碑人如絳縣
渾多壽譜自延陵有別支南望越山懷隱
逸晚晴濡墨坐題詩長州吳寬

穀粟周貧世所稀

天恩旌異姓名輝半生綵服娛親老千里蒼
頭逆弟歸春雨又生高塚草秋風空冷故
山薇哲人凋謝嗟今古獨立斜陽淚滿衣

海觀張錫

確菴已矣清風在曾式梅林又式問冠冕
文章大揚摧交親氣槩重欵歆承家克自
修宗譜發廩惟先奉

詔書珂里客尋楊子宅斗門人識白公渠海
涵大度嗟何及玉立高標信不如淳祐鄉
魁名世後晉陵郡佐發身初此邦誰也為
同列吾道今焉得緒餘未更南游薦蘋藻
臨風搔首苦躊躇

江陰卞榮

世澤綿延表里間高懷雅望有誰如留賓

每醉樽中酒繼世多存架上書排難久聞
蘇困悴賑貧曾見斥羸餘須知積慶鍾賢
嗣桃浪龍門已化魚 永嘉周旋

菟源有真樂鹿門自無虞卓哉君子人此
意良不殊少小率天性孝行稱鄉閭長大
克自對昕夕多勤劬春輝麗高堂戲彩樂
有餘周急敦大義窮困躋康衢捐財舉廢
墜惠利誠不虛大田竟千畝烝嘗以時需
庭階秀蘭玉晚景怡桑榆薤露一朝晞感

我成嗟吁綿綿後昆裕

褒贈來天書

昆陵白昂

通侯千里政循良知是僊翁有義方

華誥未來天闕寵薤歌重起士林傷慶源不
斷長流澤善譽能聞死亦香蚤歲農桑應
自力晨昏湯藥每親嘗買田供祭傳千載
蓄水通衢利一鄉竹簡編年修譜諫草堂
留客醉壺觴穹碑特表臣民義遠道曾歸
季父喪一子登庸龍已化諸孫環繞鴈聯

行青山一片牛眠暖華表三秋鶴夢長寒
食淡煙春宗宗西風宿草恨茫茫閭閻感
惠人稱頌臺閣銘文為表章有待
九重恩命下梅林宰木盡生光

吳陳蒙

吳翁浙東秀長身美髯鬚遜世不求仕谿
山耕樂漁兒時遊鄉校復與流輩殊長老
咸愛重云是名家駒十齡失其母哭泣若
壯夫二十持戶門幹蠱弗憚劬家業日以

饒親心為之娛平生敦孝敬頗亦通詩書
晨昏奉高堂盤飧列甘腴臨終極哀號眼
暗體貌癯葬師鼓邪說秉禮卓不踰居常
寡言咲家室何肅如客至輒款留烹鮮具
清醑飲酣雙耳頰擊節歌嗚嗚凶年發倉
廩全活千指餘公家為立碑永以昭里閭
置門蓄水利輦石甃路衢買田供先禩修
譜系戚疏見義必勇為曾不計有無云胡
僅中壽奄忽遊華胥埋玉故山隴楸梧翳

荒墟至今鄉里人談者咸嗟吁仁人必有
後天道良匪虛鳳雛騰霄漢蘭玉森庭除
紫誥會褒贈恩光賁玄廬

義興沈暉

悠悠世事向誰論前輩風流不復存千古
江山一洒淚百年文物幾銷魂摩挲野老
看遺傳來往鄉人感舊恩手種梅花三萬
樹依然春色滿柴門

施廉

太息吳徵士風流安在哉西州日色薄東

浙水聲哀已荷旌門 詔還憐濟世才鄉
人慕潛德時復打碑來 施謹

自跨飛鯨去不歸碧山蘿屋夢遲遲春風
寂寞花前酒夜月淒涼石上棊仗義濟人
翰菽粟敦仁教子積書詩生平潛德知多
少盡勒雲巖有道碑 錫山盛顥

讀公誌表仰公賢潛德昭昭滿目前儒業
留芳由世繼

聖恩旌義自今傳登科有子紆朱紱訪舊何

人棹酒船更是斗門遺澤在石田耕者謾
凄然

晉陵葛義

望地稱安固名門久見推
弓裘垂厚澤章布樂清時
瀟洒殊流俗魁梧表令儀
解紛蘇困悴捐廩賑鰥嫠
俎豆嚴先祀詩書啓後規
春風花滿徑秋雨菊盈籬
秀峴娛情地雲江遠興時
壺觴邀客醉琴鶴命童隨
微行章逢著英聲郡邑知
乾坤成俯仰日月自推移
命也嗟何及天乎不憖遺
漆園

觀大化渭水負前期境幻梨雲宗歌興薤
露悲誄勤騷士筆碑勒史官辭胤嗣標蘭
茁文場折桂枝家聲看益振世德衍無隳
川岳鍾靈異松楸莞茂滋葭莩慚未感臨
吊淚漣沍

甌東周凱

竭來我振安陽鐸宿德惟君稱磊落乃知
品藻在鄉評不獨簪纓貴人爵芹宮幾度
來相過雄談四座春風和可憐梨雲入寔
夢不堪薤露興悲歌有生必死信常理獨

恨衣冠空眼底芳名皎皎勒穹碑慶澤相
傳永無已
永福廖普

天地何年老光陰不肯停先生一去後芳
草幾迴青秋色間三迳月明自後庭如何
千古夢獨鶴喚難醒
鮑偉

十四世

雲巖處士生輓詩

不卜由來更不疑達人
大觀是吾師浮萍
泛水聚還散明月在天盈
復虧彭澤預為

蒿里輓淮南曾作桂山辭
曲肱紅日高三丈
比却邯鄲夢覺遲

乾坤夜旦兩茫茫
一息真成萬古長
獨有陶潛知此意
北窓白日卧羲皇

未死云胡作輓歌
此生如寄欲如何
行窩十二春風裏
還學秋崖賦繭窩

瑞安吳仕俸先生齊物而知命者也
嘗自為輓詩先得我心之所同然
庸作俚言一律二絕以贈之

江陰卞榮

義鞭向西馭大化無停機人生天地身如
寄九原一去何時歸偉哉泉堂隱君子洒
洒襟懷烟秋水景南樓上清晝長獨對古
書觀至理一晝一夜陰復陽人生有死理
之常伊人感此樂天命未死謁我求輓章
君不見杜預曠達世希有墓壙生遊長酌
酒而今千載同一心名播乾坤共悠久
魏之繆襲晉之陶潛皆自作輓詩世以
為達今吳仕倖綽有二君之風致余賦

是詩贈之

蒲田丘山

明處士恒菴吳君墓誌銘

賜進士出身奉議大夫吏部稽勲司郎中同
邑鍾清撰文

承德郎尚寶司司丞直文華殿任道遜書篆
成化元年九月二日瑞安城南吳處士卒
于家其弟祚領鄉薦卒業太學聞訃哭之
慟走謁司勲公署而予告曰祚兄弟六存
者四今仲又淪謝墓石無文失此不圖手

足之情奚盡敢以狀請先生哀而賜之銘
使其有知將不悼其不幸於土中矣語訖
嗚咽流涕予辱姻厚不克辭遂敘以銘之
處士諱裡字仕表行衍二十二恒菴其號
也生而剛直尚意氣循禮度無驕矜侈靡
之習父確菴沉毅敦潔家政整肅侍側終
日未嘗有子弟故事母王氏孝敬匪懈擇
師教子程督懇至處昆季睦族姻恩意彌
篤尤善治生貲益於舊樂周人急多貸少

償鄉曲依以為惠非其義取與一芥不屑
也遇公私艱棘奮身䟽利害苗孳髮櫛允
當其可大夫士咸材其能而推許之性不
嗜飲微賢合賓必盡歡極醉而後已方圖
構別墅藝花竹以為終老計夫何年僅五
十遘疾而卒距生則永樂丙申八月二十
三日娶陳氏橋裏名族女德性閑雅貞淑
柔嘉慎動止寡言笑舉可儀法外內賢之
先處士八年卒得年四十有四祔葬耒慕

鄉梅林祖壠之右子男四玆珽珽女二
長遠仙源季善道次許草堂鮑琰皆士族
孫男一鉅女一其孤卜以卒之明年丙戌
十二月九日奉處士柩穿陳氏壙而合窆
焉處士之父諱興號確菴確菴之父諱應
復號靜菴靜菴弟應觀仕

國朝黃陂縣令甚著能名靜菴之祖諱朴
由昆陽鏡川徙今地是為處士始遷祖也
鏡川之徙自閩赤岸朴之先曰德潤元平

陽學教諭教諭之先曰舜授宋鄉試省元
省元之先曰尹公安尉皆名高不浮于行
才具不獲厚祿時譽歸之嗚呼處士負荷
世德之懿能以禮義繩家雖隆年不永而
終於正命合附先兆可謂無憾矣是宜銘
曰

以為無壽也年登五旬

以為無聞也

名稱縉紳

繼志述事也接武前人

善積慶流也子姓牂牁

生順沒寧也

保合天真 玄宅同歸也惟

祖禰之是親

送通守吳君之任序

吳君仕德既擢常州府通判行之日常之
官于京者相率餞諸都城之東吳君就而
問為常之先務常俗之美惡今與古奚宜
衆應之曰吳君以豪雋之才策名鄉書毓
德上舍措而仕固如取如携携日斯得耳
况君温州人溫與常聲教無相去君以居

所欲為於鄉者以為常不可乎如無已則
風俗與化相移易安知今不異於昔也吾
徒久於外而莫之言陸子新自常來耳若
目宜有所濡矣盍問諸夫予非能言者然
聞入國問禁使他邦問禮仕於其地問土
風恐揆於行也士之土著者知其地知古
今理亂知風俗興替之由必究其本也常
古吳季子食邑號仁讓里宋末舉城陷敵
無降者稱忠義城唐宋之間人才甲天下

為士夫淵藪故衣冠閎闊逮今益振郡外
瀕江海內抱湖山有水珍陸產之利百凡
所需不他取給故紅陳朽貫之家累千百
世不衰其俗相親愛其民樂於趨上無褻
貳凡此何其美也然有變而之惡焉巨室
之勢足以薰官府世無即墨守能不頽頽
其間者幾人富民之利足以誘貪鄙世無
關西之楊能不投溺其波者幾人小人伏
田里一不獲則思仇其上其受役於官依

附城社者則又假虎之威鼓其害無不致
持一錢入市隨所羸而去莫之誰何有則
羅以法世無包公之明能不受其蔽者幾
人此不干政也實嘉治之本不繫風俗也
實戕化之原然常自莆陽卓侯為之守而
庶事康河東謝侯貳之而百費舉長安魏
侯監焉而賦入平吳君往而發令一堂之
上協恭羣僚之間不為勢怵不為利撓不
為羣小惑此其所可為而可先為者也為

其所可而後無不可為也衆曰吳君有麋
豹之求子之言詳於唐景可不虛其問矣
今之于行者必重以文如得此何必文哉
成化己丑歲夏季望日

賜進士及第翰林 國史編修晉陵陸簡序

監察御史薛為學 吏部主事陳賓

刑部給事中白昂 芮幾

戶部主事陳恕 光祿寺署正吳盛

順天府推官劉弘 大興縣知縣張紀

昌平縣知縣蔣悅

錦衣衛指揮胡礪

太醫院御醫蔣宗武

進士白紵

道錄司玄義丁與明

姚倫 王纓

舉人蕭用

談綱

李濬

邵珪

邵暉

贈常州通守吳君之任序

郡之有通判非古也置自宋藝祖初平始也若以為監郡則當與守異以為倅則是守之副當與守同同與異果孰居乎曰皆非也苟不論其是非但曰監郡以求異晴

而又雨何時而成事曰守之副以求同以
水濟水何能以克事此皆無用通判為也
通判之職我

朝通謂之府僚僚之長官亦曰和而已和固
非異也亦非同也譬之羹焉水火醢醢鹹
梅五味之相齊濟其不及洩其太過焉爾
守所謂可而有否焉我則獻其否以成其
可守所謂否而有可焉我則獻其可以去
其否是以職無所乖政無不平而郡可得

而理矣韓子曰天下之事成於自同而敗
於自異蓋以是夫韓子之同非彼之同即
此之和也雖然和非庸衆人所能必有待
於窮理躬行之士故天官卿每慎於擇人
何況當今賦出於天下江南居十九而江
南之郡常為富饒其敢不得其人輒易而
授之耶吳君仕德世家溫之瑞安為邑庠
生少穎悟日求詩書六藝之學而通之丙
子之歲遂領浙闈鄉薦入試春官不利卒

業國子凡天下古今之事變無不探而索
之嘗歷政內臺無滯事行已無肯有所污
京司高官貴人氣焰薰灼不屑一造其門
歲之五月擢為常通判以君之窮理躬行
必知所以作官矣抑特乎其異而混乎其
同耶抑與守相可否以和其政以治其民
乎茲將之任君之交友翰林謝君鳴治徵
言以相行予故告之以此豈曰贈君亦惟
與君相可否也

成化五年龍集己丑夏六月望徵仕郎前修
國史中書舍人蘭谿郭時頤序

刑部主事林克賢 工部員外郎黃孔昭

行人司行人李觀 尚寶司司丞任道遜

中書舍人蔡昇 鴻臚寺序班黃燦

順天府通判徐拱 綿州知州金敷

神武衛經歷江適 留守衛千戶周朝烈

進士趙良 柳演 鮑麒

士友丁輔 薛穰 季育 祝奎 馮英

薛黼 胡節 黃福 洪奭 彭俊

葉恭 蔣愷 鄭澤 趙旺 項旻

鮑椿 楊瑛 項秉中 孔彥清

柳楷 周朝宗

江右名門育俊英
青年闕下早蜚聲
東山霖雨蘇民困
南國梅花帶雪清
神物有靈隨地出
枯菱無力待春生
輶車聞說來詢俗
父老江邊望使旌

秦旭

稱賀還任

身坐黃堂席未溫便供臣職效趨奔扁舟
載月經淮浦匹馬凌寒度薊關聖旦表文
天上進同年衰曲日邊論明朝又說毘陵
去依舊相思役夢寔 樂清鮑椿

赴任未五月即有是行諸公贈送甚多
舟中為風雨散逸惟鮑公一章獨全蓋
得諸先考云 孫銀識

時太府貳府相訐未歸推府孫公欽擢

去途中見寄

海宇君多擅令名，幸居寅末喜相親。應知
異地殊方客，暫作同堂合席人。情洽芝蘭
投氣味，心涵水月絕埃塵。別來南北幾千
里，回首毘陵是暮春。興國孫需

贈通守吳公報政序

朝廷建官而必立考績黜陟之法者，所以使
之修乃職，共乃事，檢乃心之意深矣。夫三
載而不考其功，則勤者怠者罔知所警，策

九載而不明夫黜陟之典則賢不肖罔知
所勸懲又將焉望其興起感發以懋勉於
所司之職務哉書曰三載考績三考黜陟
幽明禮曰三歲則大計郡吏之治而誅賞
之以唐虞三代之時而此法已為之周密
如此况我

國家承胡元以受命得無一掃其陋習而因
革唐虞三代之治乎是故法無不立而立
無不善也瑞安吳侯來倅吾郡既三載坦

坦恂恂動無過舉可謂能守朝廷建官立
法之意者矣其為政惟務為其所當為若
職有未盡則思所以盡之事有未舉則思
所以舉之而未嘗有出位之思是可謂能
修其職而共其事者矣其立心一從古道
若奉公而無私守法而不犯者乃其緒餘
耳是可謂能檢其心者矣嗚呼若是者其
可多得哉吾常郡何幸而得見斯人與昔
鄭善果為沂州刺史有政績考為天下第

一路嗣恭為簫山令考績為天下最鄭與
路之賢固可知矣而不知修若職共若事
有若吳侯與其檢若心又有若吳侯者與
是未可知也而猶得以書最於天下矧吳
侯之賢又有逾於二公者茲將報政於天
官其將何以書之耶戒行有日郡庠弟子
沐侯之教深被侯之澤廣樂頌侯之德以
為別而愧無文辭以發之故徵予文以華
其行雖然侯之德之賢昭彰在人耳目久

矣亦奚待於文辭哉亦奚待於文辭哉

成化癸巳秋七月望日

賜進士出身大中大夫福建承宣布政使司

左叅政致仕昆陵段寔序

庠生閔湜 徐誥 張孟賜 曹侑 蔣縉

鄭謙 徐訓 貢冕 朱經 段瑤

陳璘 秦勵 葛松 殷繼隆 賈憲

丁友貞 段瑜 丁稼 龔詵 唐貴

李擬 張濟 楊洪 許慶 黃壘

蔡术

龔訥

夏翊

鄭宗綰

楊翰

段玉

周膺

金英

杜术

吳鐸

孫瓚

陳奎

胡華

唐欽

俞玘

楊溢

潘泰

詩

為郡多年政有成邦人爭羨隱之名温同
美玉常含潤湛若澄江不易清萬姓口中
傳善譽

九重天上候嘉旌君家又有河南守青史于

今說治平

晉陵王謙

太常寺卿

佐政黃堂政績優今年秩滿上皇州酒浮
綠蟻催行色風引青雲送去舟悵別偶臨
鳧渚外趨朝應到鳳池頭遙知奏最承

恩渥五色雲中拜冕旒

關西張機

常學教授

送吳常州考績還任序

常通守瑞安吳君仕德既為常之三年將
報政常之民謂不可舍君以治又二年而
始得有事于吏部吏部考君績當最將聞

之

上以復于其位以終其治于常之民於是
君之友中書鮑君良壽輩相與榮君之行
屬予言以贈且曰君之于常也其處心也
平其操心也慎官無廢事而民亦不擾不
為赫赫之聲而政亦無不達茲其考績也
予之不為譽得之不為愧其褒旌遷陟而
顯異之也而亦不為過而如是以往子其
以為何如哉予曰甚矣考績黜陟之難也

子知之乎古之君子不下堂而天下之情
舉積此者其公生明其端慤生通其誠信
生神明而通通而神則其所視聽者近而
所聞見者遠矣是以陟一人不以為榮而
人莫不以為勸曰吾寧自棄于明時也黜
一人不以為辱而人莫不以為懲曰吾寧
自累于明時也身之所長上雖不知而不
以悖君身之所短上雖不知而不以取賞
無賢不肖莫不以情自竭而毀譽之私自

有不得而容者矣世降而下鮮復斯道君子者獨立其間則曰吾懼得罪於賢士大夫之公論而不欣戚於有位者之黜陟懼吾脩諸身者之未至而不有餘不足於一凡人之毀譽故其言曰苟不知我而謂我仲尼吾安取榮焉不知我而謂我盜跖吾又安取懼焉知我者之善不善非吾果能明之也要必自善而已矣於乎世復有斯人哉吳君好古近實貌如其心蓋嘗有見

於是者而予與鮑君之於君又皆友也友
有規之道焉因得以為贈而重有俟於他
日

成化甲午夏六月二十五日

賜進士出身翰林院編修黃巖謝鐸序

吏科都給事中徐 吏部郎中黃孔昭

尚寶司卿任道遜 薛胤

監察御史李釗 胡敬

刑科都給事中虞瑤 刑部郎中金文

刑科給事中趙艮

兵部主事林鳳

中書舍人黃瑄

郭時頤 蔡鼎

行人司行人李觀

光祿寺署丞應頊

工部主事鮑麒

順天府推官薛黼

鴻臚寺序班柳楷

兵馬指揮陳鏗

尚林苑監錄事葉應斯

舉人楊瑛

會同館副使黃仕寧

監生倪祥

丙申進賀 聖旦舟會江右左布政孫

公相與如舊識別時見贈

連船萬里上京畿
器共芝蘭味最宜
水國綠萍無定跡
江城紅雨是歸期
和風扇暖冰初釋
春景揚暉日正遲
懷抱不勝羈旅悶
謾揮彩筆和題詩

渭北江南總一天
旅逢知己且同筵
千尋壯氣橫雲外
萬種離愁舉目前
黃鳥數聲春柳畔
烏鴉幾點夕陽邊
獨憐萬里

朝天客
明月清風
棹畫船

判袂河梁
歲月遷幾
回亭遠
曲江邊
君今

已許登高級我昔空誇是少年
碧樹遠凝春野目彩雲遙掛夕陽天
相期聚首情須迫水溜洪高舫不前
德興孫需

贈別駕吳公致事序

予北角時聞青田王公惟準瑞安吳公仕
德皆以明經領鄉薦心竊慕焉天順癸未
予會試禮部始得接于京邸二公循循雅
飭引予為忘年交明年予第進士尋拜刑
科給事中而二公適再至禮部得以日相

往來敘舊好資益者幾年三既而仕德判
常州惟準刺濱州深喜其志得行也第風
晨月夕不能不興契闊之懷今年冬
天子萬壽聖旦仕德以上

表稱 賀來未幾惟準亦来自考績予三人
者偶復胥會如疇昔不啻所謂逃空虛而
聆罄欵者其為樂何如也一日仕德不告
於朋友不聞於親戚故舊力辭歸惟準沮
之不可叩於予曰禮七十致事仕德年未

五十而歸宜與夫禮若不相似然借曰有疾且志不衰力不憊毛髮不種豈真疾耶其所存何居予曰年不待暮有疾便辭古人嘗有是也蓋亦有托以是者矣有以道不行者有親老者有欲釋重權者有不樂聲利而急流勇退者有志於幽靜者君子於此皆有取焉仕德其必有一於斯邪語未竟適仕德亦至予遂止而酌之堂中酒半惟準具以前所扣於予者詰之仕德避

席曰子之言固也吾固不敢為過激之行也抑吾聞之知止不辱知足不殆吾及吾年之未邁而與兄弟族人優游泉石以陶吾天真之樂是吾之志也吾何久戀名位而阻塞賢路哉惟準聞其言而高之顧與予曰仕德之志其吾子所謂急流勇退者歟於是相與舉觴為壽盡歡而罷翌日惟準持軸屬予文為贈於乎士之方其窮也患不能達既達矣患不能久至有鍾鳴漏

盡夜行不休不至於債事覆餗而不止焉
者其於仕德相千萬哉功成名遂身退天
之道也予請為誦之

成化十二年歲在丙申十二月望

賜進士及第奉議大夫大理寺左寺丞縉雲

虞瑤序

贈通守吳君致仕還瑞安詩序

今年冬十月瑞安吳君仕德以常州通判
再來朝

賀于京師既訖事遂有乞身之請吏部察其年且壯勉留之明日請益堅惘惘然若不得去之為戚於是以其情達

上許焉君再拜而退即日就道曰吾事畢矣大夫士知君者皆高其志以為不可及而又惜其用之不底于成也君聞之惕然曰某無能安於自足耳不知其他於乎此足以見君之所存矣在蠱之上九傳有之曰士之自高尚亦非一道有懷抱道德不偶

於時而高潔自守者有知止足之道退而
自保者有量能度分安於不求知者有清
介自守不屑天下之事獨潔其身者迹是
而觀君其量能知止而退以自保者與其
視終身得失之為患安危利菑而不知返
者殆不啻什百而千萬矣抑世之人固有
獨潔其身不屑天下之事者然或出於一
時矯異憤激之為而非其中心之所安則
亦安能保其終身之不變而無怨悔也哉

君歎然退遜不僕僕以自見第曰吾無能
吾無能於乎此足以見君之所存矣或曰
吳君之自處則可矣而所以處君則吾不
知也予曰不然君子之於事惟其誠而已
彼退而誠者固無所事於進吾顯而用之
以風厲天下則吾之職也苟誠知其志之
不可誣不牽制之以順成其美則亦不害
其為崇獎之道若乃進退之間漠然不加
意之又從而為之助焉則亦豈吾所能知

也哉君行之先一日太學金君弘高君彝
輩相率為詩以贈君而謂予不可默乃為
之序

成化十二年歲在丙申冬十二月吉日
賜進士出身翰林院侍講兼修

國史 經筵官黃巖謝鐸鳴治序

禮部侍郎林鶚 吏部郎中黃孔昭

兵部員外郎林鳳 刑部郎中金文

尚寶司卿任道遜 嘉蔬署丞戈譽

中書舍人鮑椿

蔡鼎

鴻臚寺序班黃燦

柳楷

西城兵馬指揮陳鏗

留守右衛千戶周朝烈

詩

鍾鳴漏盡五更殘
神武門中蚤掛冠
鄉國無殊京國好
青雲不似白雲閒
看山意遠雖堪樂
戀闕情深恐未安
棧撲化沾慙我久
捐埃未報敢云還
太平金弘乞得君恩下
紫宸歸裝不染晉陵塵
兒童

借問新來客猿鶴欣逢舊主人門途何妨
紅葉滿煙波偏與白鷗親浮名勘破潭間
事誰識風流賀季真 白泉陳以性

急流勇退到甌江明哲身閒志已降辭穀
掛冠今有一清風高節世無雙百花潭上
驢乘步五柳門前鶴共腔多樂田園成遠
引幾人白髮戀家邦 樂成高彞

年逾強仕便懸車凜凜高風愧不如元亮
辭榮非為酒季膺知止豈緣魚香山社裏

添人物宦海波中息毀譽太史他年編隱
逸定呼椽筆為君書 三峯黃榮祖

妙齡馳譽中青錢宦轍遨遊二十年猛使
政成酬素志懇求身退樂歸田晉陵遺惠
思先輩安固高風啓後賢我亦久耽林下
趣他年有約共盤旋 會文孫璉
不欲浮名絆此身掛冠歸釣浙河濱北山
謾作移文誚松菊于今有主人

柳楷

宦途聲譽共稱賢底事匆匆蚤息機青鏡
流年尤未艾白雲芳草苦思歸秋風動處
鱸偏美晚稻香時蟹正肥從此間中多樂
趣功名富貴竟成非 獨峯葉禧

昔步蟾宮志已伸毘陵別駕七年春急流
勇退知機早林下相逢見幾人

林下相逢見幾人逍遙物外樂天真幅巾
藜杖行吟後猶有丹心戀

紫宸

昆陽鮑麒

人情誰不欲遷官壯日投簪世所難古徑
欣逢松菊秀方塘喜逐鷺鷗團春風笙管
聲初沸夜月觥籌興未闌多問淮陽老別
駕時來相與服金丹 儒風里孔彥閭
行義欣聞償素志知機惡肯溺輿情不圖
鄉國尊鱸美敢為公家利祿縈遠釣白雲
添逸興飽殮黃菊壽遐齡樓舫時泛耆英
社尋聽漁歌款乃聲 泰順鮑恭

諸公再贈

坐對秋風裏，尊臚滿地思。
拂衣看獨往，愧此尚羈縻。
赤芾應何事，青山亦可為。
昆陵今日路，共嘆失劉隨。

黃巖謝鐸

作倅頻年著，好聲儘多惠。
澤被蒼生掛冠已，遂林泉樂對酒難。
為故舊情目送天邊，飛鳥倦身隨沙際。
野鷗輕毘陵父老重相見，只恐遮留不放行。

仕德年未半百，即決意賦歸，可謂急流勇退者矣。士風寧不因君而一重耶？可

嘉也為賦是詩送之

括蒼金文

握粟相逢問好官
乾坤誰識有青山
昨聞寶慶朱輪返
今見毘陵別乘還
日落都門歌杖杜
鴻飛冥漢出塵寰
試開三徑栽松菊
看到諸孫鬢未班

仕德與予同領鄉解而佐郡相問甚熟
今無力挽而置諸高位聽其引疾決去
不能無愧於所職也然人心競奔之際
而有此急流勇退者又寧不為士風之

一勛哉故臨行既以小詩綴於諸公之
後而又賦此以見予之不固留仕德者
亦有謂也

洞山黃孔昭

淡淡宦情流水逝翩翩歸興白雲孤青山
是處堪投足懶向王君乞鑑湖

瑞安吳君通判常州政聲大著年亦未
艾遽爾告歸誠急流勇退也故賦此送
之

華亭張弼

十載功名鬢未星秋風忽動故園情非關

斗粟折腰懶自是浮雲過眼輕倦鳥祇知
三徑足皇天肯負一官清歸時好卜予公
宅門下須容駟馬行

吳公通守吾郡者七年淳良典雅不假
聲色而政治燁然今年以疾謝歸郡民
遮道請留者再四竟不可奪於乎吳公
位不滿德治不終惠云遽去耶吾輩若
何其為情耶古之仁者必有後請以是
意寓詩祝之

義興邵賢

人似登僊昔共舟風便五兩過輕鷗短篷
聽雨桐江泊小轎行春天竺遊 命拜九
重官別駕麾分千里佐諸侯繁華忽厭毘
陵郡歸卧青山到白頭

帝京十月少風霜官柳來時葉未黃慶壽
表呈恩錫宴乞骸書上錦旋鄉梅開一路
花迎旆月滿孤篷酒載航西崑集雲山咫尺
好期白髮共徜徉

到郡爭看畫錦過攀轅卧轍吏民多黃堂

人物才無忝綠野衣冠鬢未皤西崑雨聲
秋入屋東安月色夜澄波尋常一覺平明
夢笑殺槐根蟻聚蝸

朝辭北闕暮東甌潦到青山未白頭平日
酒醒松下石百年盟結水邊鷗海鮮入市
厨兼味田穀登場戶有秋喔喔雞聲重睡
穩半窗花影擁衾裯

宦海帆收躡坦途故園松菊未荒蕪拄條
竹杖如乘馬著網芒鞋不化鳧詩就座間

留客和酒酣花下恠人扶待予歸共君頭
白畫入香山九老圖

六七年来幾送君都門今日重殷勤雙旌
道在酒難醉獨鴈叫空人失羣白髮舊交
愁對月黃堂上佐去眠雲温常只隔千餘
里故國他鄉此際分

集雲山下竹亭幽君到鄉園可暫遊十景
分題詩有韻一尊留客酒無籌情深聞笑
貧為樂道在寧云食是謀傳語家僮盛栽

菊歸來莫待雪侵頭

右近體七首并九老松拙筆敬為常州
通守致仕吳君仕德贈

八一道人任道遜書

數箇修篁渭水濱
陳君妙筆頗通神
奉將致政吳侯去
明日山中見故人

武進王輔臣

大理寺少卿

春風千萬花花落
春無跡此君冷淡
安時有好顏色

張弼

送通守吳公致政還瑞安詩序

詩人類以解組歸隱為高而譏相逢不能
踐言予謂不然仕所以行其道也致君澤
民忘身徇義顧各有時苟非其時而貪戀
忘返可止不止斯則可譏與其可譏不以
歸隱為高耶君子當審其時哉瑞安吳君
仕德成化己丑由成均釋褐來倅毘陵毘
陵大府也公廉勤自持溫和率下盡心殫
力以佐政令故知公為豈弟君子公嘗私

諗知已曰仕官所以適志粗適我志可以
言去何必計買山錢耶向因同官方圮自
壞固難言爾今幸

朝廷遴選劉公來守是邦才而且能政無不
舉况二守諸公同心協治乎是我可去時
也未幾公慶

賀如京師偶疾作遂杭疏乞歸吏部重違其
請聞于

上允焉公風韻瀟灑髮無二毛其為白首不

知歸者耻矣行有日醫官施彥清暨姪克
莊錫唵壇之傑慨斯民不能為卧轍留業
詩人歌咏為公賀推予序其端昔陳希夷
評錢若水可學僊麻衣道者馱謂急流勇
退人爾其後若水仕于朝年四十餘即求
去急流勇退固神僊流也吳公要亦神僊
之徒歟舊聞瑞安山水秀麗魚鹽富庶士
生其間多英邁特達近若憲使呂公運副
金公皆公鄉曲予之故人也文章政事表

表在人未及引年先公解組丘壑而遲公
矣公歸相與杖履往來於東阡西陌掇芳
擊鮮釀酒醉飽咏天保之詩歌太平之盛
其樂曷有已也其樂曷有已也煩為我寄
聲詩若干首皆近體

成化丙申臘月

奉議大夫知東平州事致仕錫山劉弘序

詩

盛滿還思退高風冠古今霜蹄從立仗風

翼且投林浙水花迎棹吳山月照琴府中
遺愛在棠樹有清陰

錫山秦旭

武昌太守

毘陵為政功成日上疏
明廷便乞還人

到急流先勇退天教未老早投閒
畫舫載月荷花浦
蠲屐穿雲鴈蕩山多小
迷途長

往者白頭相見果何顏

黃公祿

醫官

未老封章即引年
九重優詔許歸田
共

誇若水知機早
獨羨淵明隱興偏
三徑秋風黃菊裏
一竿春雨白鷗前
野人林下懷

遺愛日誦甘棠蔽芾編 高直

蘭陵別駕溫如玉五十懸車世所稀
舊業山中三徑在清風江上一人歸
閒雲流水醒塵夢野鶴林猿識錦衣
自是甘棠有遺愛臨岐父老重依依

李庶

幾年為郡振清風側耳民謠處處同
獨岸角中東浙去休傳蕙帳北山空
投閒自喜盟沙鳥得失無煩問塞翁
好覓謝公行樂地南亭花月興無窮

成性 戶部主事

曾聞獻績上京畿何事陳情又乞歸千里
鄉關頻入夢半生爵祿已忘機白雲流水
閒扶杖紅日茅堂靜掩扉欲慰蒼生期再
出豈容飽嚼故山薇

倪祚

監察御史

拂衣高興薄層雲去伴山冠戴白綸空谷
和風流古瑟滄溟湍水縱游鱗五雲臺省
登諸老萬壑松泉見一人陶令歸來頭尚
黑此心誰解懶呈身

莫驄

工部主事

冥鴻飛去海天遙弋子徘徊不可招謾有

清風灑丘壑已多仁政被翦莩高風醉倚
門前柳落日行尋谷口樵好是六龍城下
路郡人猶自起歌謠

施廉 醫官

七年施政治雪月浸瑤枝昔日歌來暮今
朝動去思閒情陶徑菊惠愛峴山碑未絕
蒼生望 徵書起有時 施謹

謝公已去魏公沒眼底升沉何忽忽回首
孤雲倦鳥心功名夢入華胥國古來張翰
稱達生忽憶秋鱸萬里行飄飄長興一朝

逝邈邈高風千載名此日吳侯去東浙春
光不駐來時轍知機早覺上書遲鑑湖花
滿青山月山可肩輿湖可舟間情無事夢
為州囊中謾作娛賓費咲舉烏紗未白頭
侯鄉項君吾故吏善政年深思豈弟甘棠
花底愛民碑他年亦是思侯意 陳公懋
智哉君子心進退不可識惓惓思濟世轉
眼復去國有如龍與虎不為兔且獲有如
鳳與鸞不與雞爭食爵位雖云貴舉之付

一擲高歌入巖戶易安審容膝開酌眇庭
柯展衾卧盤石回視寰宇間蟻蠓空役役
賢者智闔智能者力角力頭白不解官往
往遭逐斥何如早歸來山中且寧息

華夫

久厭塵埃案牘勞急流勇退志清高如君
真可三翹首從此無勞一折腰赤脚蒼頭
隨驥足黃金白碧等鴻毛所思莫訝無徭
役 聖主崇賢有禮褒 晉陵王謙

太常寺卿

照回劄付

吏部為老疾官員事該本部奏考功清吏
司案呈准文選清吏司付奉本部送據吳
祚告年五十六歲浙江温州府瑞安人由
監生任直隸常州府通判為因公差到京
今已事完思得年老有疾不能任事告乞
致仕等因送司查無違碍照得先該本部
題

准今後遇有老疾自願告退官員年五十五

歲以上者冠帶致仕案呈欲將本官照例
發落未敢擅便

成化十二年十一月十七日本部官具本
於

奉天門引奏奉

聖旨是欽此欽遵緣本官係自陳休致官員合
就劄付照回原籍冠帶致仕有司以禮相
待免其雜泛差役須致劄付者

右劄付直隸常州府致仕通判吳祚准

此

成化吏部拾貳年印拾壹月十九日對同都吏張爵

花押 左侍郎

劄付

花押

尚書

花押 右侍郎

祭酒王公簡

潤別中殊劇企想昨鄉人至聞已旋旆又
聞謝事已得請用是愈增悵望急流勇退
閣下之自處固高矣其如吾民之有缺終

惠何羈宦無由攀
錢家僮歸匆匆作此愧
無以頌盛德云

王與

朝天像贊

容粹而淳神爽而清
賢科擢秀胄監蜚聲
出倅大邦入覲明廷
惠政在民俯協輿情
命服在躬仰荷寵靈
鵬翮方騫苑裘已營
噫觀公之志蓋將留
遺愛以昇之蒼生歛
餘福以被之雲仍者
耶

晉陵王與

國子祭酒

行樂圖

黃堂退食從容處
曾次洒然忘百慮
清風飄飄天際來
遊絲細細煙中駐
晉陵繁雄豈易易
錯節盤根知利器
譬若庖刀初發
刃肯綮恢恢有餘地
一張一弛乃文武
一遊一豫諸侯度
古人亦與今人更
使後人慕喬松
參天獨孤檜有松
鬱鬱皆晚翠
堅不磷
介于石
南山巖巖良足配
素琴中含太古音
聽之可以諧人心
孤鶴

相從自相得長歌再續鳴臯吟先憂後樂
平生志聊復形容托繪事功名遠大當何
如麟閣雲臺後此始

江陰卞榮

戶部郎中

雙鴻四鵲圖

銀塘水滿秋風涼芰荷落盡紅衣裳蕪葭
蒼蒼滿洲渚白露夜冷將為霜飛來雙鴈
喜有秋相呼飲啄還自由燭罌不舉罷繪
弋江湖無復懼人憂鵲鵲欲下還復鳴分
明猶有急難情使君誦詩憶兄弟非關愛

畫為丹青漢庭尺布尚可縫周家伯仲猶
火攻嗟哉人胡不如鳥披圖對爾當汗容
君家翩翩六兄弟日日春風詠棠棣斯禽
好止君堂前慎勿飛鳴過有痺

海觀張錫

又

鴻乎鴻乎若比翼相逐天南與天北萬里
年年送霜信三湘處處逢秋色鶴鴒在原
飛且鳴宛是急難兄弟情鴻飛鴻止不失

序亦是人間弟與兄
吳侯濟濟六兄弟同
道同心本同氣
一圖雙鴻四鶴
鵠須信良工
寓深意或鄉國
或天涯風雨連床
有所思安得鴿鴻
聚一處伯氏吹埴
仲氏篴嗟嗟尺布
與斗粟人生胡不
念手足莫教空對
紫荊花此圖此意
宜三復 卞榮

謝方岩公詩

病中蒙慰用韻

以酬

方岩謝鐸

百病侵尋與老并
宦途重到本非情
素殮

怕聽陞堂鼓伏枕還叨署印名歸去夢終
慙活路遭逢 恩已負平生行藏道在吾
何敢安分心胸頗自明

兩月愁眠印在封夢中岐路幾憧憧病來
宦况十分惡老去歸心萬折東黑髮自應
輸少壯清時誰不羨遭逢故園物色宰相
待碧水丹山憶未窮

天生痴癖故難醫螻蟻微誠敢自欺最愛
漆雕能未信却慙仲子為權詞行藏有分

江山在歲月無情鬢髮知袞袞諸公半臺
省小臣鴛下復奚為

白頭休更問何如未老功名意已踈得去
尚堪收末着重來那敢怨當初 聖恩自
惜憐衰病吾道誰能濫緒餘不用魚羹還
有飯從來容膝是吾廬

寂寞羈懷每自矜白頭無奈此清燈是誰
請告還莊助空復思家似杜陵百歲光陰
嗟已老兩年 恩賜轉難勝拂衣若許東

歸去便是人間有髮僧

萬言難乞一身閒慙愧深
恩抵厚顏天地得心淹
白髮東南自古著青山未
離炊黍夢覺枕空憶玉門
生死關世事看來忙不得
且教君復咲痴頑

世路真如百尺竿坐驚平地
有多般看人每覺進而易
到我翻成退亦難溝壑初心
猶掘強江湖客氣已摧殘
首丘若許方巖去也為東南障海瀾

病裏遙聞 詔旨溫旅情無賴轉消魂半
生正是慙虛譽萬死何能答厚 恩
菴李
滿城春欲老菊松三徑晚猶存何年脫却
真羈轡一咲居然對子孫

歸田後柬

方巖謝鐸

僕科舉學廢久矣衰疾之餘尤所未解辱
遣令郎來特以興仁故留與之伴實則相
誤多矣今不意小兒復爾傷天有孤令郎
之留何可言也家雞野鷺之喻於是乎徵

遠地無由一面奈何情亮萬萬

後二年詩以相期

相望百里近相別升年多縮地不能至問
天將奈何公心應未老我鬢已全皤莫負
中川約流光急逝波

邑令高侯常之江陰人也初任見贈

萬卷予今未半行詎宜先此被榮光退然
方念隨孤竹可也無端及子桑 丹闕湛
恩深雨露黃堂文德見星凰消埃莫罄師

模近頰仰令人蚤夜忙
高賓

代巡江西見寄

早膺名薦起東甌
解組歸來正急流
倅郡有聲群口在
立身無忝此心休
兒孫恒業安耕讀
風月閒情付釣遊
盛德繫人千里望
海雲江樹思悠悠
高賓

成趣亭序

常州別駕瑞安吳公以成化丁酉解綬致
事于家維時大夫士莫不偉其明炳幾急

流之勇退也舊廬在縣治之城南市心公
厭闐闐喧襍厚直購地於豐湖之南文峯
之下營宅一區軒齋宏敞以為佚老計宅
後有園廣數百丈壘石為山鑿地為池池
之構前小亭亭之外環以松竹列以花卉
四時之景靡不可觀公日與二三君子燕
樂其中翛然得山林之趣澹乎忘軒冕之
榮於是摘取陶彭澤園日涉以成趣之語
名其亭曰成趣儒林士友皆形諸賦咏以

道其美俾彞遜序之且夫趣者因其外而契乎中得於心而寓諸物吾心之所獨得非可以語人言也雖不可以語人而亦非已之所得私也必有同此志者然後能其趣爾聖門之浴沂咏歸由也求也亦也不得與曾點同是趣庭草交翠惟二程與茂叔之趣同而他人不與焉武夷九曲之擢歌能與考亭同是趣者幾何人哉既不得以同其趣尚能有以成其趣乎然則成趣

之旨惟公之所獨得也豈淺見所能測哉
雖然世有古今道無古今人有先後心無
先後心同則理同理同則道無不同矣曾
謂道同而趣有不同者乎蓋心汨乎欲則
昏迷蔽固而不知此趣矣心存乎理則明
通公溥而趣自我成也趣成於我我成其
趣物我兩忘不知趣之為我乎我之為趣
乎若夫山川之勝景物之佳亦趣中事也
工乎詩者皆能發之奚假予言哉公名祚

字仕德號東巖逸叟由鄉貢進士而擢前
職在官七年清慎自持綽著能績歸田已
十稔足不跡公府今方五十有八六子皆
俊拔岐嶷仲子珵肄業邑庠將秀待實能
繼家學云

成化丙午冬朔旦同邑木彛遜序

詩

殊方折桂忝同年幾度看花竟惘然半刺
分符臨大郡深仁澤物渥源泉知幾自信

收綸早得請誰知放棹先結箇隱窩幽僻
處鄉人爭道是壺僊

田登

温州通判

成趣亭含天地春四圍佳致絕纖塵小山
戟列雖然假造化生生却是真

宋綽

瑞安知縣

諸公嘉章甚多庚戌秋為中夜驟風雨
所壞止傳二首姑錄于此

真樂會鐘方伯公清任太常公道遜祖
考通判公三人而已所遊題詠今皆失

傳清樂會大尹徐公鉞撰序同會司訓
顧公瑄閔蔭芳任太常公蔡大理公昇
謝戶侯壽祖考六人所遊十二景皆任
公所圖人各一圖圖各一式其中人物
皆不盈五分態度雅飭纖悉具備精妙
罕有世謂任公六絕此其一也諸公題
詠並存今止錄祖考所作于後勢不暇
也皆用顧公韻

護國叢林

山上青山去復來寶臺如畫對山開雲連
石徑盤迴入門夾松筠次第栽僧有龍團
延客久官無騶從任人猜如箋白石三千
片卓筆題詩亦壯哉

東山梵剎

路入東臯第一山山中何物不清閒樓臺
半出松杉杪窓牖多開翠碧間有約僧來
終夕坐無心雲去幾時還晚涼重上峯頭
立何處乾坤別一寰

棲隱經樓

我輩功名志可酬相逢喜作碧山遊烟霞
隔水有餘地風景近山無此樓貝葉經函
三藏去蒲團禪宿片雲留明朝有約重來
此春滿雨花臺上頭

天王講寺

崑西何處最清幽古剎樓臺亦可遊山水
數楹無六月竹松一望醉雙眸雲深地有
春前蕨市近門無夜半舟假取小齋風月

夕人生何必羨封侯

崇真道院

世事無端不足傷且開懷抱共徜徉青山
城廓塵無跡白槿巖扉花自香四座衣冠
慚我與滿城車馬可誰忙熒煌臺閣飛鷺
處輸爾崇真舊道場

淨土招提

隔斷紅塵不一里小橋流水出塵寰城中
風景只此地樓上雨聲多是山今日且輸

吾輩樂明朝還爾老僧閒吟壇風月多瀟
散不問鴛鴦第幾班

三御影堂

畫堂高殿訝輦輪近古衣冠儼若神三世
槐御門地迥九重花誥寵恩頻絮酒昔曾
來孺子吹笙今喜宴嘉賓老夫忝預同恩
列聊束生芻奠玉人

半山禪窟

半畝松陰半畝山主人長伴白雲閒鳥迎

春日饒嬌語花趁東風解好顏泉漱石琴
清不了岑凝翠碧濕難攀而今要問霞僊
跡流水無門洞有關

白塔文峯

曾記樓船湖上遊歸來惟覺此山幽清歌
復出風塵表獨上不知天地秋千里帆檣
飛鳥沒萬年形勢大江流東山花雪金屏
客杯酒春風醉可酬

錦湖畫舫

錦纜牽風柳外船
碧波吹浪白鷗前
夕陽山色入如畫
夜半簫聲鶴亦仙
漁父去分然火竹
溪翁來乞買茶錢
慚予不是天隨子
瀟散江湖又幾年

南山律院

翠擁南山伯尺臺
勝遊何幸得追陪
雲江萬里秋無際
風雨滿城潮欲來
松近雲香清漱玉
月明波白遠浮杯
杏壇司業文章伯
霜韻驚人喜押廻

萬松寶地

青山幾度看松來彷彿徂徠頂上栽黛色
千尋龍化雨蒼陰半畝鶴眠苔鐘敲落月
鯨音吼旛擁曇雲燕尾裁讀罷碧紗籠裏
句竹亭在元是老詩魁

書郡侯文公族範後

邦伯文公按治以來慮民德之未脩則有鄉
約之規欲同宗之敦睦則有族範之頒不
尚刑政專以德禮治導民觀其條目規約

綱常舉而衆目張尊卑嚴而族屬統良法
美意委曲詳盡善政善教綜理周密所謂
敷五教張四維振三綱敘九法者在是與
人為善之功大矣苟能欽承德教必孝弟
忠信以飭其躬履仁蹈義以齊其家宗族
之中父子兄弟藹然和氣之相接親戚故
舊懽然禮意之周洽以至邦人仰則而仁
讓之風行闔牆不作而公庭之訟息駸駸
淳古之風蕩蕩仁堯之治風俗美而絃誦

之聲作於下德化行而太平象之應乎上
將見自家而國自國而天下治平奚止為
一族之範而已哉斯郡斯民親際其盛何
其幸歟謹錄是範于前舊日家規祭儀姑
書于後吾族子孫當式欽式承是則是效
遵而行之舍其舊而畜其新去乎惡而遷
于善永守

邦伯之成法罔罹

聖朝之憲章庶不忝爾所生得為

盛世之良民實吾所深望于汝曹也尚其勗諸
城南吳氏重建祠堂記

高祖一碧府君元延祐間自平陽鏡川徙
居瑞安城南狀元里棟宇雖備而祠堂未
暇也四傳至吾父確菴府君乃建之所居
之東列四龕以安四世神主置田伯畝以
供四時薦祭垂裕後昆俾繼承罔怠迄今
子孫繁衍堂廡弗容序拜咸謂卜地街北
厥位面陽厥土燥剛爽塏靜閒崇祀攸宜

乃裒祭餘捐私貲經始於弘治辛亥十二月庚申落成於明年壬子四月乙卯建享堂三間中奉高曾祖考神主左右序設旁親附位前為門中為壇東西兩街以升奠獻周圍墻垣常加扁鎖此皆先志敬承而卒完之太常任公題其額為城南吳氏宗祠為吾子孫者當念吾父創始之心與吾繼述之勤凡遇節序啓豁軒如嚴恭祀事致愛致慤尊祖敬宗之心勃然而興孝親

悌長之意油然而生醇厚和睦之義藹然
雍雍如也傳諸永世孝思不忘庶不忝爾
所生矣設或視為虛室慢若容舍風雨毀
而不輯塵埃污而不知祭之時踈簡其儀
苟且其心規矩不遵倏聚倏散則褻慢祖
宗棄滅本源是異類也是生於空桑草野
之徒也豈吾之子孫哉勉之戒之斯為美
矣夫高祖始遷瑞安吾父樹立德業稽之
祭法祖功宗德若二公者世世祀之不可

遷也茲將祭品儀式燕享禮意祭田町段
備書於冊以貽後人於萬斯年常如一日
衍祖宗慶澤於無疆綿祖宗德業於不朽
益久而益昌益熾焉吾實望於後人嗚呼
言有盡而意無窮敬誦小雅之詩以祝之
詩云孔惠孔時維其盡之子子孫孫勿替
引之後人其服膺而勿失也是為記昔

弘治六年歲次癸丑六月望吉

直隸常州府通判致仕五世孫祚謹記

任中所得圖畫題詠亦錄于後

瑞鳳圖

張錫

虞廷簫韶奏九成致爾來儀聽爾鳴文王
德盛格天地竹實岐山鳴未既春秋嗟爾
不復來仲尼已矣魯興哀彼哉楚人若無
目千金空得山雞回區區漢室非虞周鳳
凰安得時來遊三公避位遜辛繕千載徒
勞為爾羞只今聖人當九五舜孝堯仁邁
今古淇園到處竹生花九苞五采時時覩

子雲引鳳陳生咲劇秦美新何足道鳳兮
鳳兮何德衰我作狂歌發三叫

谿山雅趣

卞榮

谿不必遊若耶溪山不必登天目山但得
胸中別自有佳趣一水一石相對俱歡顏
雲山烟水不可一一到霜毫寫入半幅生
絹間誰言未了公家事黃堂退食何其閒
况是曾吞雲夢者八九下視洞庭十二青
螺環憶昔濯足洞庭水水聲月下清潺潺

袖裏分明有東海酒酣夢入仇池還友于
溪花與山鳥豈為新知斷宿攀

五松圖

五松矯矯如五龍高節不受羸秦封栽培
實荷后土力昔者尺寸今摩空明堂大厦
須汝用深山匠石何由逢假令逢之亦徒
爾萬牛回首為難功予茲偃蹇非棄置千
載未可論始終上有兔絲下茯苓琥珀凝
作春霞紅誰能采采入山去好與人世扶

衰癯有泉十八此一派蒼髯影裏飛白虹
爛浸雲根冷如雪金粉乳落水壺中龍兮
龍兮毋逐霹靂去且留宇宙生清風

山水圖

張錫

煙染遠山如潑澱平湖一水如鋪練夜來
新雨叫鞦韆溪邊流出菴花片山人不入
城中去茅簷常與雲同住扁舟載酒者何
人應向楊雄問竒字相看彷彿覓山東猿
鳧鶴夢驚秋風主人已為明時出白雲昨

夜隨飛龍

雲山圖

卞榮

山重重雲濛濛雲兮作雨致年豐山不動
兮萬古同物物皆由造化功安得直上第
一峯灑氣呼吸與天通却將心事訴天公
洞徹老天明與聰歸來却掃一畝宮吾君
堯舜臣夔龍十日一雨五日風坐令四海
春融融

山水圖

我昔夢天倚天表九朵芙蓉望中少而今
看画在人間螺綠半勻清未了興來欲寫
夢天謠十頃平湖作硯沼少陵詩句宛然
見春花冥冥日杲杲人生得意且為歡莫
坐春愁天共老

南山圖

竹南胡袍

南山一何高秋色與之俱豈無古君子氣
節相參差天地本悠久風霜自凌夷重彼
君子心体之乃厥宜富貴不能淫威武不
能移出彼 山雲為霖沛四時居同南山

石貞固難與渝仰答蒼蒼仁偃視諸甌叟
緬想陶淵明采菊來東籬去去千載後復
見斯人歸景行在高風拜獻南山圖

翎毛

竹亭任道遜

浪翻麥隴風作狂驚飛野雉投葦塘蒼鷹
側目意有在驚飛水鳥徒傍惶鷹乎鷹乎
義不識恣爾翫瓜恃其力豈知玄造發生
仁生物豈惟資爾食爾輩可惡亦可憐一
朝化鳩空兩拳
兩人種田還與鳥

雀相周旋

其二

灘長鴨嘴寒潮低沉菰折葦風淒淒羣飛
四鴈各有態宿者不寐食者饑遲其飛者
來何後鳴者相呼重翹首楚天空濶斷行
高絕塞孤臣書到不牧溪馬生繼者誰林
良撒脫天成竒出入崔黃雜馬夏有此筆
力難為師

其三

神鴉神鴉爾莫鳴爾鳴不獨羣鳥驚愁胡
側目雙蹲鷹健翻失勢忌爾聲便當斂翅
閉爾口讓彼櫻搏爾非後春蒐冬狩人所
資功歸指視亦何有風高碧漢迴鵬雛跡
滅狡兔藏妖狐白月照霜寒夜徂一聲兩
聲稱慈烏

其四

寒骨已生風力尖高才咏絮不道塩雙蹲
野雉凍欲死相偎相倚徒鷓鷯水鳥於寒

果何有鷓鴣瀨偶其偶樹頭鴝鵒立亦
久脉脉情牽重翹首羨彼作者知化工物
精而與人情同人輕物類兩眼空九天禽
語誰能道

翎毛

卞榮

秋高霜清野草黃勁翮利爪不可當訓狐
合受老拳折山梁胡乃懼其殃士之執雉
以性剛華虫亦曾登舜裳直須才雉櫻狡
兔勿容九窟終身藏

其二

排風一陣同飛起，叫破碧天秋。
萬里聯翩，向晚落平沙，穩宿蘆花。
啄菰米，桑弓鐵箭，此地無夜驚。
不必勞其奴，明朝寄跡，知何處。
斷雲殘雨，渺江湖。

其三

東海飛來影不孤，直上九天搏鵬雛。
恠哉翩然雙靈鳥，翹首相親如相呼。
鵬也毛血洒平蕪，不搏靈鳥仁矣乎。
古之司寇爽鳩。

氏其義且仁如是夫

其四

清時物物皆攸居
鵠鵒來巢何必書
參君不敢剪爾舌
嚼玦行看入我廬
時哉時哉者
雙雉文鴛戢羽酣
春睡有鳥有鳥空
長啄沙白水寒魚
自避

雲鷺

張錫

長江浩浩風初歇
一派春波與天接
底事青雲萬里間
墮落如拳一團雪
愛爾翩翩

好羽翰不作羣飛太劇乾何當直上青空
去要使時人仰面看

鷹

卞榮

海東萬里如雲飛百鳥不敢誇雄姿若為
久立枯樹枝爾輩正合當軒墀太公擬爾
揚牧野未可喚作決雲霓雲中鵬雛且勿
擊妖狐狡兔一掃之

山水四景

張錫

春林雨過聽鳴鳩滿地間雲似水流寂寞

茅堂人不見江湖間却濟川舟

宗宗茅堂小客來空餘鳥跡印蒼苔白雲
本是無心物也愛青山掃不開

霜染楓林秋作春野航恰受兩三人分明
一段家山景恠得雲遮認不真

玉龍凍倒勢蜿蜒雲壓孤村雪滿天金帳
羊羔無處着紛紛飛上釣魚船

又

卜祭

不聽丁丁伐木聲山中春鳥自嚶嚶便須

坐石看雲休負山靈舊日盟

水亭清氣似冰壺三伏炎蒸半點無披此
因思舊遊處碧瀾堂下看啣鱸

客况無如此地幽閒居有賦不悲秋清江
蘋末風來早涼影飄飄見白鷗

上下四方同一雲六花無處不紛紛空山
寒氣侵詩骨人比梅花瘦幾分

翎毛

卞榮

不逐鳧雛傍母眠徐徐雙泛碧漪連詩人

重爾關風化詠入周南第一篇

荒草平原八月深妖狐狡兔一朝擒呼鷹
臺上休相望別有青霄萬里心

翠竹陰中立晚涼時哉何獨羨山梁天然
自有文明象飛上重華十二章

雲染玄裳映素衣 青山下昔曾臨天教
未化黃金印留與人間送好音

雙鵲

張錫

喞喞長鳴未肯休綠楊枝上粉墻頭使君

又

卜築

雙立秋庭玉對柯成橋昨夜渡銀河主翁
莫恠頻頻噪天上人間喜事多

山水

日上東山暖霧消好花開遍是花朝不勞
拾翠人相問策馬南塘第五橋
松間滴翠濕人衣天上火龍空自飛細閱
黃庭坐清晝山中應是客來稀

木落霜飛灑氣新
楚天空濶四無隣
悠然獨對南山坐
不是悲秋作賦人
千山積玉雪晴初
江濶漁舟一葉如
莫笑水寒魚不食
直鈎無意在求魚

松

有聲元自無聲起
天籟猶如地籟清
不入世間箏笛耳
山中宰相獨怡情

謝却東園桃李花
自甘偃蹇老年華
曉烟不逐西風散
鎖住蒼髯一半遮

清標獨立大夫官
風雪從教逼歲寒
凍結玉花吹未落
鶴巢高處不勝寒

山中老態益清癯
世上塵容半點無
四壑浮雲多捲盡
老龍吐出夜明珠

山水

竹亭

微茫烟水接滄溟
雨脚隨雲渡遠堦
門掩江村舟泊岸
不知山色為誰青

江上潮來風作波
江頭樹色雨中多
一行鴈落征帆外
薄暮具如客路何

上苑丹中

藹藹百疇蕙盈盈十里蓮爭如此花好向

日自年年

卞榮

墨飽霜毫好醉人等閒隨手寫花神摩挲
老眼求形似惟得丹衷一寸真 竹亭

北堂慈壽

菽水歡何限北堂春復秋忘憂雖賴汝母
氏自無憂

卞榮

筆下寫生心自憂丈夫寧得為花羞慈親

永別兒頭白道是忘憂忘底憂
竹亭

滿庭春色

南浦客愁劇西堂詩夢多
一庭風月裏相

對足清哦

卞榮

雨後淒淒草色新
自家意思屬何人
若教閒對元離別
南浦中庭已是春
竹亭

三徑秋香

會意不在遠
愜懷何必多
一枝從秋好
三徑奈伊何
卞榮

獵獵西風燕草黃芙蓉楊柳瘁清霜故園
菊向圖中看蝸角縈身客路長竹亭

徂徠曉雲

卞榮

昨夜夢騎龍飛入徂徠去朝來披此圖分
明夢遊處

瀟湘烟雨

不見霓裳下空煙望欲迷瀟湘宛然在只

欠鷓鴣啼

千山風雨

千里復萬里五風十雨同吾民無菜色誰
不荷天公

千山秋月

千巖復萬壑松色與泉聲人跡杳不到高
秋孤月明

萬壑春雲

雲來何藹藹雲去且遲遲及早作霖雨蒼
生渴望時

松

竹亭

雲擁徂徠半繞空
素光分處出蛟龍
飛騰不作白日雨
偃蹇自堪長夜冬
老大有材須見用
穠纖無節若為容
何如花柳饒春色
遍地紛敷雨露濃

竹

煙雨微茫湘水深
湘妃何處夜沉沉
鷓鴣聲歇初更候
斑竹淚流千古心
楚岸蘄然輕若草
柯庭椽得貴於金
淒其不啻孤舟客
隔岸君山自結陰

通守吳公傳

通守吳公者溫之瑞安人也其先諱朴自平陽鏡川徙是邑之南城凡五世乃至公公自少嗜讀書穎悟日發年甫十五入縣庠為博士弟子治科舉業行輩咸推先之景泰丙子年二十八以詩經領鄉貢進士第五十六名明年丁丑天順改元上春官會試中亞榜除職不就遂入太學自是三試禮闈皆亞榜成化己丑年四十一吏部

循選法掄材授官擢常州府通判膺職未
久適貳府與府尹構禍當道命公權署公
盡心竭力其最著者有六於民患也踏勘
武進田被水而傷稼者一伯六十九頃免
徵秋糧米若干千碩馬草若干千包明年
辛卯勘是邑田因旱而禾稿者二千八百
頃免徵秋糧米若干千碩馬草若干千包
春末發廩以濟宜興之饑者萬八千七百
戶糧米二萬二千三百碩其秋復不斂民

以饑告者二萬六千七百戶賑以糧米二萬九千碩歲壬辰郡之屬邑皆大侵公乃奏請於

朝發廩九萬九千八百碩以濟饑民凡八萬九千戶前後全活者咸曰生我於溝壑吳通判公也其於學校也郡之學宮災公與衆議勸義民捐貲助建輪奐聿新仍奏請頒給經書置造祭器樂器無錫學宮弊隘公白於滕都憲給在公羨餘復締構之仍

諭閭右以佐其費規畫有方而功易集士
類罔不仰德其於水利也武進孟瀆等河
淤塞者十三處䟽決之使通又修築洋頭
大岸之圯處千七百餘丈無錫走馬塘河
以丈計之七伯有奇盡開浚之凡此取次
以完公私皆便焉無錫武進江陰宜興四
邑之民凡二十三戶為同姓者妄援軍役
致擾頻年公為悉心研查舊籍無干輒與
分豁無錫有過姓者叔姪忿爭產業未結

適有陳乙者死其叔唆人以謀殺陳乙陷
其姪姪既誣伏獄成其家訴寃積歲不白
公承代巡聶委審出死者平日為盜被兄
陳甲詬辱自縊而死於是過姪之誣以明
宜興周源武進馬諒皆刁徒也誣告知縣
孔儒孟瀛累至伯人公承代巡姚戴二公
之委廉得其情坐刁徒以誣罔而二令之
抑以伸公之能讞獄也如此

成化丙申秋賈進

萬壽表文赴京俄有疾作遂援例乞致仕吏部
尚書尹公留之不已引奏

上俞其請賜歸田里時年四十有八識者謂
公能於急流中勇退信乎知足者也公天
資溫厚立心行己一以誠實殊無矯飾接
人之際恂恂其貌款款其言而和氣盎然
既謝事卜築東城外未嘗抵公門有所干
謁惟修先塋建祠宇嚴祭祀續世譜以報
本睦族為事嘗與鍾方伯任太常輩結真

樂會觴酒賦詩得逍遙物外之趣今正德
戊辰壽登八十安強夷愉聰明不衰樂有
子孫之養而諸福備焉困辱公愛厚獲聆
誨諭蓋數數矣竊惟公以科第發身得仕
以行其所學功成名遂而身早退德尊一
邦而享夫高壽求之士黨幾何人哉幾何
人哉謹傳之俾_後之修人物志者有據焉

正德三年秋桂月新城蔡困炳深述

明故承德郎常州府通判致仕吳公墓誌銘
賜進士出身朝列大夫南京國子祭酒侍

經筵官前翰林編修同修

國史致仕臨海周玉撰文

常郡通守致仕瑞安吳公以正德十年乙
亥八月四日卒于家其子瑀偕其從孫庠
生錯持邑博張君文應所為狀不遠數百
里而來拜而請曰先人抱純誠之行完出

處之節然位不滿德而實浮於名不得君子為之立言何以闡潛德而垂永遠乎言甫出口而淚已盈睫厥情甚懇予不容辭按狀公諱祚字仕德先世有諱遠者五季時自閩徙溫平陽之鏡川家族繁盛人名其地曰吳家埭詩禮相承代有聞人若淳祐癸卯鄉魁舜授平陽學教諭德潤皆其表表者德潤弟德源生朴始自吳家埭析居瑞安城南狀元坊左公高祖也曾祖敏

祖應復父民載別號確菴行誼重鄉閭配
王氏側室金氏公金出也自幼穎異有大
志力學不輟正統癸亥確菴遣遊邑庠景
泰丙子以詩經領浙江鄉薦天順丁丑會
試禮部得乙榜辭不就職卒業成均每季
試居優等試春官輒不利嘆曰是命也成
化己丑銓選常州佐政殫厥心恒以崇儒
惠民為先務嘗署郡章郡學災聚材鳩工
不數月告成仍

奏請頒經書完祭品無錫學弊且隘不足以容生徒白諸當道出公帑恢拓締搆之士類仰德辛卯壬辰歲大侵民餒死公為奏請發廩粟十餘萬石全活不可勝計疏浚孟瀆走馬塘諸河及築洋頭大岸圯處厥功甚鉅公私便焉屬邑民有為仇誣係戎籍者二十餘戶累年不斷公為研究析其真偽又有過姓者叔姪忿爭適有壽死非命叔嗾其家誣以謀害有司

